



PESERTA bergambar kenangan usai program.

# BAKAT INSAN ISTIMEWA

Suhazli Muhamad raih tempat ketiga bukti kemampuan dalam pengucapan awam



**Redzuan Muharam**  
gen.y@hmetro.com.my

**Penuntut** Universiti Putra Malaysia (UPM), Suhazli Muhamad membuktikan kekurangan diri bukan halangan untuk memenangi hadiah utama apabila meraih tempat ketiga dalam Pertandingan Inspirasi Ikon Varsiti Peringkat Kebangsaan 2017 yang dianjurkan baru-baru ini.

Kemenangan itu melayakkannya memenangi baucar Sijil Simpanan Premium BSN bernilai RM300, piala iringan dan sijil penyertaan.

Manakala, johan dan naib johan menjadi milik penuntut Universiti Sultan Zainal Abidin (UniSZA) Muhammad Syafiq Mohd Sakri dan Amirul Shah Mohd Amin.

Masing-masing membawa pulang Sijil Simpanan Premium Bank Simpanan Nasional (BSN) bernilai RM1,000 dan RM700 berserta piala iringan juga sijil

penyertaan.

Dalam pertandingan itu, Suhazli yang juga penuntut ijazah Sarjana Kejuruteraan Perisian itu memukau juri dan hadirin menerusi syaran bertajuk 'Lapar : Lawan' yang mengangkat tema keazaman serta kegigihan mencapai sesuatu matlamat tanpa menghiraukan kekurangan diri.

Persembahan yang berkait rapat dengan dirinya itu secara tidak langsung mengingatkan hadirin supaya mensyukuri nikmat yang ada.

Penasihat Program Dr Mohd Istajib Mokhtar berkata, pertandingan itu dianjurkan Kolej Kediaman Kelima Universiti Malaya (UM) membabitkan lebih 22 institut pengajian tinggi (IPT) dan Institut Pendidikan Guru (IPG) dengan 41 peserta bersaing di peringkat saringan.

Katanya, daripada jumlah itu, enam peserta layak mara ke peringkat akhir dan penganjuran edisi kedua cukup istimewa dengan penyertaan penuntut OKU serta kerjasama daripada Seksyen Kaunseling dan Kerjaya UM.

"Matlamat program ini adalah untuk memperkasakan kemahiran pengucapan awam dan tahun ini peserta dikehendaki



**SUHAZLI**  
Muhamad  
sedang beraksi  
memberikan  
ceramahnya.

menyampaikan perkongsian berbentuk motivasi atau yang berkait rapat dengan pengalaman diri .

"Menariknya, pertandingan ini tidak mempunyai kategori sebaliknya terbuka kepada semua penuntut termasuk OKU dan peningkatan jumlah penyeratan daripada golongan berkenaan dilihat mencapai objektif untuk memperkasa polisi varsiti yang diperkenalkan UM pada 2015.

"Ia juga dapat menggalakkan daya siswa OKU secara holistik selain memberi peluang kepada mereka untuk membina keyakinan diri," katanya.



**SUHAZLI** menerima  
hadiah daripada  
penganjur.